




10707





象胥錄序

鄭端簡公吾學編所次四夷
考精核簡嚴居然良史而根
據多畧且編纂亦止於
世廟余往在職方間按歷代
史牒及耳目近事稍為增



定以訖萬曆紀年如佛郎機
魯迷諸國前考所缺者併摺
攬訂入庶幾展卷可哲本末
蠻陬夷落如指諸掌矣頃居
臚寺多暇因發篋中舊稿
重加叅證乃竊嘆

皇靈之遐暢而廟戰之無寧
畫也國初
真人首出梯航重譯

文皇帝遣中使三下西洋疑
動遠畧而北犁虜庭南討交
趾蓋締構規摹倍應廣大

曾幾何時而南交棄河套失
哈密亦不守寢悞而遼左翦
焉異域矣雖云外夷逆順譬
同癰疥而未嘗不眎中朝生
嚮背內治脩則鱗介可化為衣
裳邊備弛則藩籬將存為豺

虎深維往轍固強徼得失之
林也島夷出沒鯨波西戎遠
在天末沿右不能與中國
爭衡而通番之船不禁則勾
引轉滋賈胡之末日衆則窺
伺漸啓至閩浙之海寇內訌而

閩陝之流賊颺發所在伏莽又
何論要荒絕徼之外乎鴻臚
昔辨典容掌諸歸義蠻夷
寄象鞅譯自閩職守况常汜
事借箸網羅舊聞不為姐越輒
因蒐錄成書貂續端簡題曰象

胥以志

國家賓師之畧他如北虜女直
及西南溪峒渚蠻夷別有裒
集間與端簡詳略不無異同
要以聚米畫地各暢人意非
敢闕奇耳食如優孟之學叔

教也時

崇禎己巳秋日之吉歸安茅瑞徵
書於南鴻臚署之嘉會軒



皇明象胥錄

凡例

一東夷首朝鮮琉球以請封脩貢謹爲我外藩也
次日本海上設防倍空詰恣夫寧有戒心焉南
蠻首安南蓋嘗郡縣其地矣占城而下並爲波
臣略從海道爲次西戎首哈密故領袖西域尚
存遺意土魯番而下皆西域夷也西番種人頗
繁第以番括之兀良哈則北狄矣虜部猥雜別
有編纂茲不復贅列云

一諸國曾通朝貢雖小必書此外賈舶所至間爲收錄若要荒殊詭萬狀不能殫述也

一諸國頒有勘合及載在

祖訓者大書備錄其小邦偶一脩貢附入之如佛郎機和蘭不列王會仍次滿刺加呂宋後

一各夷名號全以會典及

歷朝實錄爲據間與稗史異同並爲改正

一諸國沿革本末博攷歷代正史凡有關大體備錄之

一拂菻在嘉峪關外榜葛刺雖係東印度然在西

天數中會典並列東南夷未當今改入西域

款下

一臨文有犯

御諱遵照近例改書

一編纂盡于萬曆紀年以往歲備員兵曹耳目較核爾後姑從闕疑以俟君子

一家鮮

賜書學慙窺豹雖偶抽鄴架探討略盡四夷然空

錄例

藏板

涉酉岩演繹應窮五技異開牆面庶啓蓬心

茗上茅瑞徵識

男胤京

同訂正

胤武

皇明象胥錄目

卷一

朝鮮

琉球

卷二

日本

卷三

安南

卷四

象胥

芝園

占城

真臘

暹羅

瓜哇

蘓吉丹
揀里

丁機宜
日羅夏治

吉里地悶
合猫里

三佛齊

百花

文郎馬神

淳泥

南巫里

蘇祿

彭亨

柔佛

婆羅

卷五

滿刺加

佛郎機

呂宋

和蘭

美洛居

蘇門答刺

阿魯

梨伐

賓童龍

錫蘭山

覽邦

溜山

柯枝

小葛蘭
卜刺哇

木骨都束

古里

古里班卒
祖法兒

阿丹

忽魯謨斯
阿哇

古麻刺

西洋瑣里

瑣里

淡巴

甘巴里
木蘭皮

討來思
打回

勿斯里
咭吟

順哈

卷六

哈密

赤斤蒙古

阿端

曲先

卷七

西域

土魯番

火州

黑婁

于闐

亦力把力

撒馬兒罕

沙鹿海牙

渴石

賽蘭

哈烈

達夫罕

卜兒花

魯迷

拂菻

天竺

榜葛刺

養夷

失刺思

天方

默德那

阿速

沙哈魯

敏真誠

火刺扎

卷八

西番

兀良哈

皇明象胥錄目

象胥

祖訓不征諸夷

朝鮮

日本

大小琉球

安南

真臘

暹羅

占城

蘇門答刺

西洋

瓜哇

彭亨

百花

三佛齊

淳泥

右凡十五國職掌所載又有瑣里西洋瑣里

覽邦淡巴須文達那諸國

頒有勘合國

暹羅

日本

占城

瓜哇

滿刺加

真臘

蘇祿國東王

蘇祿國西王

蘇祿國峒王

柯支 淳泥 錫蘭山 古里 蘇門答刺
古麻刺

洪武十六年始給暹羅國以後漸及諸國每
國勘合二百道改元則換給

皇明象胥錄一

朝鮮

歸安茅瑞徵伯符撰

長樂郡
振錄
請
卷七

朝鮮直遼東南古箕子國初箕子胥餘既陳洪範
避地朝鮮商衆從者五千人武王因封焉乃教民
禮義田蠶爲約八條俗貞潔夕戶不闔飲食以籩
豆其號朝鮮以日東出鮮潤或云境有汕水故名
周衰地邊燕燕自立爲王欲東略地朝鮮侯亦稱
王將起兵逆擊燕尊周室大夫禮諫使西說燕罷

其兵後子孫稍驕燕遣將秦開西闢地二千餘里築鄣塞朝鮮寢微秦并天下築長城抵遼東朝鮮王否服屬外微否死子準立會陳項起燕齊趙民多亾附是時去始封已四十餘世矣漢興脩遼東故塞界沮水屬燕王盧縮縮反走匈奴燕人衛滿聚黨千餘椎結胡服度沮水說準居西鄙扞邊準拜爲博士遂得秦故空地益誘燕齊亾命役屬詐稱漢兵至還攻準準亾入韓滿遂自王朝鮮都王險孝惠時滿約爲外臣保塞益威行旁小國兼有

濊北與高句驪沃沮地凡數千里傳子及孫右渠漢使涉河誘諭不奉詔已又襲殺何武帝遣樓船將軍楊僕勒兵五萬從齊浮海左將軍荀彘出遼東擊之城守不下乃使濟南太守公孫遂以便宜并軍急擊其相殺右渠降因分置樂浪臨屯玄菟真番四郡時元封三年也昭帝省爲樂浪玄菟二郡而玄菟徙居高句驪西北其沃沮濊貊並屬樂浪以斥遠分置樂浪東部都尉漢末公孫度起玄菟越海收東萊諸縣自侯遼東傳孫淵封樂浪公

淵又自立爲燕王魏滅之晉永嘉亂陷入高句驪高句麗本扶餘別種世以高爲氏至高璉併有朝鮮居平壤死年百餘歲平壤亦曰長安城南臨涇水卽樂浪郡地外復有國內城漢城爲別都號三都云自璉後稱高麗貢獻無常隋封其六世孫湯爲高麗王煬帝渡遼水親征至再不克振旅而還唐武德初其王建武遣使入朝命道士以像法往爲講老子建武築長城千里東北首扶餘西南屬海尋爲蓋蘇文所弑旁擾新羅太宗詔北輸粟營

州以總管張亮帥募兵四萬吳艘五百泛海趨平壤李勣帥騎士六萬趨遼身誓師東拔遼蓋二州歸高宗已平百濟會蓋蘓文死子男生與弟修郟遂以李勣節度轉燕趙食膾遼東乾封三年勣率別將薛仁貴等拔扶餘城大破之王藏請降剖其地爲州縣置安東都護府總章中徙高麗民三萬於江淮餘衆反奔新羅及突厥靺鞨儀鳳二年封藏朝鮮靺鞨王畱安東死子德武爲都督後稍自國元和未遣使獻樂工其國東徙鴨綠江東南千餘

里歷後唐同光中高氏屢奉職貢長興三年權知國事王建代立明宗乃拜建玄菟州都督高麗國王王建益并新羅百濟地自廣東徙松岳以平壤爲西京子孫終五代修貢不絕周世宗嘗以帛數千匹市銅高麗以鑄錢宋太宗卽位其王佖遣國人金行成就學擢進士是後詣監肄業以爲常會契丹伐女真道高麗界女真意高麗構禍因貢馬愬于朝太宗出所上告急木契示高麗使歸白王治還所俘而王治方奉表契丹得所取女真國鴨綠

江東地數百里淳化後遂爲脅制朝貢中絕咸平六年遣使來朝言晉割燕薊屬契丹遂有路趣玄菟乞王師屯境上牽綴契丹索前地其王詢徙昇羅州以紓禍大中祥符三年與女直設奇遮擊契丹築城鴨綠江東自是絕不通中國垂四十二年熙寧初詢孫徽來脩好神宗亦欲結之以謀契丹改登萊貢道由明州元豐元年造兩艦報聘自定海絕洋而東而徽奉契丹正朔往往兩屬通使元祐八年高麗獻黃帝鍼經詔頒天下其使請鬻歷

代史及冊府元龜等書禮部尚書蘇軾疏却之有旨書籍經買者聽宣和中求二醫往歸日王楷語曰聞朝廷將用兵遼遼兄弟國存之足爲邊扞女直虎狼不可交也願二醫歸報天子早爲備及回奏無及矣先是遼侵高麗置保州金巴克黃龍府高麗請還舊疆不許及遼亾王楷稱藩如遼例而宋自高麗改貢道明越困於供給兼慮爲金間罷一切使命紹興三年楷脩貢仍溫詔答焉當是時其國都開成府依山險名曰神嵩卽松岳也東京

新羅爲東州樂浪府南京百濟爲金州金馬郡西京平壤爲鎮州而西京最盛元興契丹衆九萬餘竄據江東城元遣偏師會高麗滅之歲輸貢後絕信使太宗命撤禮塔往征抵王京其王瞰奉牛酒勞師尋叛竄海島憲宗末遣世子俱入朝瞰卒歸國更名植世祖徵植脩世見禮朝上都至元初立瀋州處高麗降民遣使通好日本諭旨爲鄉導期得要領併相視耽羅道路植爲其臣林衍所廢立弟涓議征之無何植復位來朝詔西京內屬改東

寧府畫慈悲嶺爲界以安撫使佩虎符戍其西境
中書省請屯田金州安撫使阿海略地平珍島植
致書日本使通好經略使忻都入海拔耽羅城詔
高麗僉軍助征日本以皇女嫁世子懋襲父爵改
鑄駙馬高麗王印賜之懋子諫諫子燾嗣王燾傳
弟暲以訖元亾 國朝洪武元年遣符寶郎傑斯
賜高麗王顥璽書二年顥表賀貢方物 詔齋金
印封爲高麗國王頒大統曆復諭王固圉蒐乘謹
備倭無崇信釋氏 賜六經四書通鑑漢書使者
言王顥有侄女遭亂沒軍中

上令中使訪歸本國仍厚衣餼三年遣使代祀其
國山川會定取士格 詔許高麗安南等國貢赴
京師會試以沙漠平往諭四年 賜高麗貢士金
濤第以不通華言給道里費回籍中書省奏禁使
者闌出貨物不許五年安置歸德侯陳禮歸義侯
明昇於高麗王顥請遣子弟入太學表言耽羅國
多畱蒙古人及蘭秀山逋寇宜詰治 詔耽羅已
屬無滋疑忌逋寇可傳檄定其罷兵以貢馬不誠

卻其使七年諭中書省高麗頻涉險來貢宜令三年或比年一聘八年王顥被弒以養子禍嗣貢愆期 勅遼東守臣勿與通十年請顥謚號

上曰顥弒久今始請謚將假朝命鎮服其民且掩逆跡其勿與降勅切責遣都督僉事濮真往訊死之十二年高麗屬夷龍州土官鄭白等內附守將潘敬葉旺以聞 勅無受降開釁十六年陪臣張伯崔泊來貢以頃歲不庭渝約卻不受 命禮部咨諭之十八年許禍嗣王 賜故王顥謚恭愍貢

布萬疋馬千匹謝明年請易冠服不許二十年指揮僉事高家奴等市馬高麗還言禍辭馬直諭鎮守延安侯唐勝宗償直如勅初遼瀋民多避亂高麗及往市馬故元降將咬住等言

上索之至是高麗送馬並流民二百八十餘來歸二十一年降人言王禍欲寇遼東其將李成桂還兵囚禍 勅嚴備往偵狀是歲廢禍立昌昌復廢立瑤權國事蓋恭愍王顥無嗣爲嬖臣洪倫等所弒國相李仁人誅倫迎立養子禍禍昏恣興師內

寇以李成桂爲副將至鴨綠反兵禍惶懼遜子昌
國人弗順恭愍妃安氏擇立王氏孫定昌君瑤二
十四年瑤遣子奭朝明年正旦 詔班尚書下奭
未歸而李成桂復廢瑤自立其國都評議司奏瑤
信讒妄殺子奭亦痴騃非門下侍郎李成桂莫可
主國

上曰高麗僻處東夷聽自爲聲教成桂遂更名且
徙居漢城請更國號 詔仍稱朝鮮王氏自建開
國歷四百三十餘年而絕李成桂者全州人自言

遠祖翰仕新羅爲司空六世孫競休入高麗至成
桂凡十七世竟代王有國

上以遠夷置不問心固弗善也且遣使請朝鮮印
及封誥表不孫下吏索撰表人鄭總安置雲南二
十六年遼東奏朝鮮陰誘女直人五百潛度鴨綠
江將寇邊下勅切責 諭守臣謹備絕貢使二十
九年請印誥不許且老聽以子芳遠襲卒謚康獻
永樂元年芳遠表言洪武中賜金印龜紐頃經建
文更制乞如舊頒給 詔予印誥及冕服九章春

秋會通等書二年

上欲屯田遼東徵牛朝鮮芳遠以萬頭獻 勅遼

東都司分給屯田每頭酬絹一疋布四疋 賜其

王文綺表裏六年世子提來貢七年諭進馬供用

芳遠獻萬匹助征虜十六年請老子祠嗣時遷都

北京距朝鮮爲近二十一年征阿魯台駐蹕沙城

祠遣陪臣崔雲奏事令還京胥命宣德元年芳遠

卒謚恭定 賜嗣王祠五經四書性理大全通鑑

綱目因謂禮部尚書胡濙聞祠勤學故賜之令小

國民蒙惠亦朕所樂也二年 勅進馬五千匹四

年祠獻海東青 詔珍異非朕所貴其勿進使還

賜王磁器勅貢獻唯土物無以金玉七年遼東都

司言諸屯缺耕牛諭朝鮮選給萬頭償以絹布五

萬疋如前例時毛憐建州夷詐爲忽刺温野人犯

朝鮮境朝鮮以兵攻建州遣使勅諭八年總兵官

巫凱奏朝鮮擅兵

上曰遠夷爭競但謹邊備而已祠欲遣子弟入就

學不許仍 賜書俾學國中九年聞黑龍江七姓

野人議侵朝鮮 勅徇嚴爲禦正統二年建州左衛都督猛可帖木兒爲七姓野人所殺其子童倉與叔凡察逋居朝鮮界尋得罪亡歸四年建州都指揮李滿住等言朝鮮招叛朝鮮亦言凡察誘侄童倉逃匿慮與李滿住同謀生釁諭仍還境城凡察等言徇阻留部落六年徇復愬凡察舊居境城阿木河此離失所撫恤備至近徙東陲忽潛依李滿住誰爲追阻滿住居婆猪江屢引忽刺温掠臣邊今凡察與同惡背恩已甚

上勅徇國家倚王爲東藩如凡察滿住異類畜之無與較七年以建州朝鮮構怨命錦衣衛指揮吳良等齎勅諭朝鮮集境城人口質審去留戒凡察無妄索會瓦刺密令女直諸部誘脅朝鮮徇拒之白其事

上勅獎徇忠誠 賜綵幣并諭徇東寧等衛諸逋逃無問漢人女直並擒解無貽累爾國十年倭犯朝鮮來獻俘時虜寇邊 詔朝鮮備馬三萬景泰元年貢馬五百奏比歲馬耗損未能猝辦止勿復

貢禔卒子珦嗣遼東報虜掠開原瀋陽及圍撫順女直李滿住凡察董山等爲迫脅入寇勅珦飭邊防勦三年珦卒謚恭順子弘暉嗣五年 賜弘暉宋史從其請也弘暉穉而孱七年遜其叔琛遣內臣冊琛爲王天順三年登州衛運遼軍布花舟漂至朝鮮撈捄得十之七琛給衣糧送歸朝 賜勅獎諭是歲琛納建州酋董山私授中樞密使謀得其制書遣科臣往琛飾詞出制書示之驚服貢馬謝罪四年朝鮮誘殺毛憐衛都督郎卜兒哈兩降勅解讐五年建州衛野人乘夜掠義州諭朝鮮無挑禍成化三年郤所進海東青白鵲王師征建州琛遣中樞府知事康純等率兵萬餘協攻遂斬李滿住及擒勦部落以俘獻 璽書褒異加賜金綺琛尋卒 賜謚惠莊子珦嗣始冊封率遣內臣時遼左薦饑御史侯英疏稱中使繹騷朝鮮號秉禮國乞簡廷臣往

上是之著爲令六年珦卒謚襄悼以子幼立兄子娶嗣王七年娶奏李滿住子索而哈聚衆脩怨乞

邊臣應援十一年復奏建州野人糾毛憐等衛夷
侵擾時禁外國互市銅錢弓角等物十三年婁奏
小邦北連野人南隣島倭

高皇帝嘗賜火藥火砲今乞弛禁市弓角令歲市
五十無過多十四年朝鮮貢使還被寇掠官較捕
獲都御史王越請梟示彰國法仍還原刼以慰遠
人十五年建州酋伏當加等復盜邊 詔朝鮮夾

擊婁遣右議政尹弼商等渡江擣巢多擒斬明年
春來獻捷 賜宴禮部亡何建州掠朝鮮從騎以

報擣巢之役弘治初歲貢獻如例七年婁卒謚康
靖八年封子慳爲王十二年慳請搜還下海民戶
遼東守臣亦奏軍民逃聚海島得及時解散從之
慳病風令弟懌權署國事正德二年懌嗣王十三
年修貢請更會典所載宗系嘉靖改元遣脩撰唐
皋宣諭以親藩入繼大統意始

毅皇帝時懌請冊世子中使金義陳浩寅緣內降
往賜懌等金幣括取異物及童男女至是以禮官
言報罷十五年以 皇子生頒詔朝鮮先是 皇

嗣册封始遣使外夷

上特令詔諭因著令甲明年脩撰龔用卿等使朝鮮還請凡事關禮制一體諭知卽令陪臣賫示報可十八年表賀上 廟號尊謚及

睿宗祔廟明堂禮成御奉天門延見使者二十三年朝鮮民洪贊等航海漂入通州海門界傳詣

京師給衣糧護歸明年漳州民李王乞等通番漂朝鮮送遼東都司權國事世子皓以王懌訃來告皓嗣未踰年卒立其弟峒二十六年峒獲福清通

番人馮淑等并貨物解遼東咨稱閩人向無汎本國者頃前後獲千人皆市易日本闌出火藥軍器恐起兵端

上令查勘海道 賜峒金幣旌忠順三十一年峒以 國初所賜樂器敝壞奏求律管仍乞遣官赴京肄習以遵朝制三十六年大內災峒上表奉慰三十八年倭犯朝鮮擊之盡殪因賀冬至奏聞并歸所掠獎賜有差明年賀使至遼直虜傷從官一詔自今朝鮮貢使並迎護出境隆慶元年表賀

肅皇帝尊謚部議尊謚 廟號無稱賀禮然不當
以律遠夷 賜幣報聞其冬 岷卒謚恭憲從子 肱
嗣立初李成桂易姓

高皇帝心惡其篡而傳者復訛以爲仁人子因著
祖訓稱李仁人及子成桂凡先後殺王氏四子以
爲永鑒其後嗣累表白世系非仁人後并言恭愍
弑由嬖臣仁人誅倫立禍迫禍寇遼先臣成桂反
兵傳昌至瑤竟以國人擁戴請命代立未嘗身與
弑逆願得湧雪萬曆三年重脩會典乃更定如今

文云二十年倭乘朝鮮弛備大縱兵巨酋行長清
正等分道陷豐德諸郡肱倉皇走義州願內屬
上采廷議遣兵部侍郎宋應昌等濟師復王京肱
得返國詳具日本傳當是時朝鮮八道幾覆非
天子深念藩籬前後特簡重臣經略朝鮮勢必不
守大抵朝鮮恭謹異它夷 國家寵禮亦加等自
洪熙後歲遇元旦及 萬壽千秋節皆遣使表賀
貢方物它慶慰謝恩無常期嘉靖十年始令外夷
元旦朝賀例改冬至大事必頒詔其國請封告哀

率遣近臣及行人冊封弔祭朝鮮使至例得瞻拜
太學禁網亦疎弘治中因女直貢夷讐殺槩譏出
入嘉靖十三年陪臣蘇洗讓請得出館游觀如舊
禮部尚書夏言覆許正使員役五日一次出館令
通事一人陪侍以示禮遇且寓防衛

上輒可其奏攷四履東西相距二千里南北四千
里其東西南並濱大海北隣女直南隣倭西北限
鴨綠江江出靺鞨之白山平壤在其東南自昔憑
以爲險分八道以統州郡曰京畿曰忠清曰慶尚

曰全羅曰黃海曰江原曰平安曰咸鏡設官舉士
略倣中國因田制俸俗柔讓以蹲踞爲恭崇釋尚
鬼惡殺多所諱忌士人喜讀書工詩文衢路悉構
嚴室號扁堂未婚者曹處誦經習射歲以季秋燕
高年吉凶悉稟家禮釀用秬廣袖戴折風巾茅居
苧衣色尚白法無苛條其敗常犯賅及再嫁書名
三司子孫不齒人首無枕骨背扁側境內山川九
都神嵩北嶽海鴨綠江爲大又有江曰大定曰大
同而漢江最勝自鴨綠東流入於海歷數千里至

漢城滙爲巨浸南卽古百濟又東爲古新羅近唐
熊津都督府土產金銀銅鐵水晶鹽紬苧布摺扇
龍文簾席白硃紙狼尾筆紫花硯果下馬長尾雞
貂豹海豹皮八稍魚杭黍松榛薏苡茯苓人參其
貢道渡鴨綠江則自鴉鶻關趨遼陽歷廣寧前屯
入山海關以達 京師凡迂回三四鎮戍成化中
苦女直邀劫請改繇遼陽南徑趨寧前職方郎劉
大夏以 祖制有微意持不可議遂罷

論曰世推朝鮮封始箕氏及讀黃少詹洪憲輶

錄乃得所謂檀君檀君者其傳堯戊辰歲有神降
太伯山檀木下國人君之至今奉祀不廢檀君與
箕子並都平壤史稱衛滿都王險王險亦平壤也
漢取爲樂浪郡范曄東漢書敘東夷特詳曰夫餘
曰高句驪曰東沃沮曰濊曰馬韓辰韓弁辰其言
濊及沃沮句驪本朝鮮地而夫餘屬玄菟韓有三
種馬韓寗大而朝鮮王準爲衛滿所破將餘衆數
千人入海攻馬韓自王則諸國當通系朝鮮其後
併入高句麗兼有新羅百濟拓境亦侈大巴乃以

隋唐師武臣力頗抗前旌號爲勁敵頃歲海波稍警翦焉幾覆強隣虎眈不遑固圉何今昔強弱逕庭哉或以向習華風轉趨文弱摩厲自強無孤卵翼亦有土自完之哲也攷箕子封朝鮮傳四十一代至準凡九百二十八年而失國準入韓地金馬郡自立號韓王又傳二百年併於百濟前後凡傳祚千一百二十餘年三代受命未有若斯之多歷者用夏變夷於今爲烈吁嗟盛矣

琉球

琉球國居海島中直福建泉州之東自長樂梅花所開洋風利可七晝夜至距福寧温台亦頗近然貢道必由閩縣以達 京師漢唐宋不通中國隋大業三年煬帝令羽騎尉朱寬入海訪異俗遂抵流求語不通掠一人歸明年慰撫不從遣武賁郎將陳稜等率兵自義安浮海擊之至高華嶼又東行二日至龜鼈嶼又一日至其都虜男女數千人而還其後遂絕元世祖遣使招諭不至元貞三年

福建省平章高興檄別將禽百三十餘人史稱瑠球與澎湖諸島相對天氣清明望之隱約若烟霧其遠不知幾千里或云於古爲流虬地界萬濤蜿蜒若虬浮水中因名後轉謂之琉球所轄有古米太平馬齒七島諸山並隔海外不相屬 國朝洪武五年遣行人楊載齋詔往諭其國分爲三並稱王中山王察度山南王承察度山北王帕尼芝皆遣使奉表箋貢馬及方物十五年 賜中山王山南王鍍金銀印文綺使還言三王爭雄長 詔令

罷兵息民十六年 賜山北王如前例二十一年以所獲元主次子地保奴發居琉球二十五年中山王遣子侄及其陪臣子弟入國學

上禮遇特厚以其國往來朝貢 賜閩人善操舟者三十六姓永樂二年中山王察度卒 詔封世子武寧嗣王是後嗣封皆請於朝冊立弔祭禮如朝鮮其年山南王承察度亦卒無子從弟汪應祖攝國來請命如山北王故事 賜冠帶嗣王武寧卒子思紹嗣九年遣使朝貢偕長史程復至表言

長史王茂輔導久乞陞國相兼長史復本中國饒州人輔臣祖察度四十餘年不懈今年八十有一請致仕還其鄉從之思紹卒子尚巴志嗣巴志卒尚忠嗣正統十年琉球商舶漂至廣東香山港巡戍欲盡戮冒功海道副使章格不可爲辨奏還其貲十三年尚思達嗣父忠立遣使朝貢亾何思達卒叔尚金福嗣金福卒弟布里與子志魯爭立失其印次弟尚泰久馳奏命給泰久印嗣王時景泰五年也先是山南王汪應祖爲其兄達勃期所弑

尋與山北併於中山其王世稱尚氏天順七年尚德嗣父泰久立卒成化七年子尚圓嗣十一年貢使還至閩恣殺掠詔著令間歲一貢貢無過百五十人十五年尚真嗣父圓立二十二年中山王尚真以官生蔡賓等五人肄業南雍經五年咨禮部乞放回省覲以聞

上報可嘉靖二年福州府盤獲琉球夷人三十二名譯稱往暹羅置貢儀抵漳州外洋遭風會倭使宋素卿等於寧紹讐殺

上恐墮奸計命併發浙江查勘三年琉球貢使金良等言本國先遣正議大夫鄭繩等貢方物渡海風漂未至請先進表歸國

上報聞許之以倭使宗設等逋誅鄭繩還令齋勅轉諭日本捕治五年尚真卒王世子尚清上表請封九年再申前請十一年勅給事中陳侃行人高澄祀真太牢封清嗣王侃等言弘治正德時脩撰羅倫等使安南安南乞留 詔勅鎮國卽琉球請留如安南海外遠恐煩往復乞下禮官議如安

南前格侃等至國授封王拜曰 天朝詔勅藏金匱八葉于茲矣遂諭旨比還特遣王親寧吉長史蔡瀚奉表謝侃等上使琉球錄言大明一統志載琉球有落滌王居壁下聚鬪骸事非實及杜氏通典集事淵海羸蟲錄星槎勝覽諸書亦多傳訛乞下所錄史館從之先是其國贈侃等黃金四十兩卻不受因附謝使奏

上以命侃等十九年長史梁梓來朝貢方物請補造海船四號續貢聽如式自備無違例二十一年

漳州人陳貴等通番下海至琉球與潮陽海船爭利相攻長史蔡廷美沒其貲以夜奔多掩殺其王尚清械繫貴等七人至福建誣爲寇御史譚審列奏

上允部覆治以通番律仍聽咨諭國王無輕與中國商民互市明年尚清移禮部以官生梁炫等四人學南雍踰七年乞遣歸婚娶 詔給資糧護歸二十四年遣使來貢兼送朝鮮漂流人口初閩人蔡璟撥賜琉球而原籍在閩二十六年其孫蔡廷

會充貢使至與給事中黃宗槩親舊通饋謁事覺下詔獄

上念貢使姑革賞行勘三十四年尚清卒明年倭寇浙直敗還入琉球境世子尚元發兵邀擊殲焉得所掠金坤等六人遣廷會脩貢賫送因言貢使須乘夏令南風迅始得歸請如三十四年例聽於福建海口自行脩買歸舟

上嘉其忠許之 賜勅獎諭厚賚金幣三十七年遣給事中郭汝霖行人李際春持節冊封尚元爲

王越再歲留福州其國遣廷會謝以倭警請如正德中封占城例領 詔册回國禮部以非故事且無世子印文不許四十一年始竣封明年遣陪臣鄭憲等入貢因送歸中國漂流人口且請歸本國流移

上令檄瀕海諸路萬曆元年尚元卒四年世子尚永嗣及永卒三十一年封尚寧嗣王如令甲三十七年薩摩州倭侵琉球虜其王四十年遣使復脩貢報中山王業反國海道叅政石崑玉等驗貢物

雜倭產請阻回俟勢定

上從部議令貢使無入朝量收方物給賞四十四年五月中山王尚寧遣通事蔡屢報倭造戰艦五百餘脅取雞籠山島野夷雞籠淡水洋一名東番云考風土以海氣蒸溽候煖鮮霜雪多颶風暴雨國人深目長鼻纖嗇好潔並用色布纏首紫最貴黃次之又次紅綠王兼五色簪以金銀差等廣袖寬博間左並縞素無木綿貧者隆冬衣苧較閩加密屋多茅蓋頃漸習陶鋪板祛塵無貴賤着草屨

入室則脫唯肅謁使客具冠履婦人以墨黥手外指爲花卉鳥獸狀髻肖童子總角不施簪珥粉黛女工麻縷地不產鍤費用螺殼亦無農器削木爲匙筯得異味先薦尊者居親喪數月不肉食以中元前後日浴尸溪水去腐取骨纏以帛裹草埋土中不起墳王及諸臣家匣骨山穴鑿木爲牖歲時展視惟謹賦法略倣井田分土爲祿食有事始均稅事已卽罷刑甚峻犯盜竊剗腹剗荆職官尊者三法司卽國相率王母舅妻父任之其次有察度

官司刑名有耳目官資顧問有哪囉官理錢穀皆武職大夫長史主封貢不與政事爲文職洪永所賜三十六姓多閩之河口人子孫秀者讀書南雍歸卽爲通事累陞長史大夫今僅存七姓凡七姓男不爲國婿女不爲王妃言語衣服無別別以椎髻居中者七姓居右者本夷也王日三朝羣臣以搓手膜拜爲敬俗稱王日敖那妃日札喇王官建山巔國門榜以歡會府云漏刻殿云奉神永樂間嘗命使爲蓋宮殿頗闕敞然以板代瓦冊封錫以

皮弁玉圭麟袍犀帶眊二品秩及妃皆有冠服綵幣初用中使宣德間改用給事中行人給事賜衣麒麟行人賜衣白澤並假玉帶從福建往治五桅巨艦長可十七丈桅用杉舵用鑊梨木其國屆期遣看針通事一人并水手來與偕密室看針卽白晝燃燈亦名十更船往以西南風期孟夏歸以東北風期季秋望見古米山卽其境東去三百里爲葉壁山又東卽日本恒與貿易假貸近國哪霸首里並有馬市販鬻率女僧市用日本錢十當一如

宋季鵝眼縵環 國初使來言其俗不貴統綺貴磁器鐵釜賜予及市馬多用之鹽舶魚艇制稍異酷信鬼不知醫藥以婦人不二夫者爲尸其魁號女君近王官有寺藏經千卷宅籍無五經有四書以杜律虞註爲經土田砂礫樹藝鹵莽野多鹿及馬牛羊豕山多蛇無虎樹之佳者鳳尾蕉貢有蘇木胡椒黃熟降檀諸香並非所產產饒硫黃海貝燕會令童歌夷曲舞以侑觴酒以水漬米越宿婦人嚼以取汁曰米奇間來自暹羅清冽易令人醉

武宗嘗賜玉杯每出爲壽學書及武以倭爲師甲用皮革矢可至二百步節以金鼓衆驍健耐饑寒勞苦好爭狠鬪度不免卽引刃自斃於海上故稱勅國然不當倭十一國別號大琉球西南則暹羅東北則日本從長樂大石出海隱隱一小山浮空卽所謂小琉球者也去閩省東鄙臺礮東湧水程特數更南爲東番諸山在澎湖東北其人盛聚落而無君長習鏢弩少舟楫自管不通朝貢又東隅有夷鳥語鬼形殆非人類或云卽毗舍那國

論曰琉球創見隋書爲流求序其國俗稍異王姓歡斯氏國人呼之爲可老羊妻曰多拔荼所居曰波羅檀洞羽冠毛衣編苧爲甲王乘木獸候草榮枯以爲年歲壁下多聚髑髏質以今日風教固殊焉元史作璫求云水至澎湖漸低近璫求則謂之落漈漈者水趨下不回漁舟遇颶風漂落漈回者百一自陳侃特標其妄或曰國西古米山有礁甚險舟至輒敗卽落漈也琉球及明始通上國請封入貢與朝鮮埒漸以華風宜其丕變輒按前後

使錄為更定之頗聞其國厯海外一岡脊無大聚落往使至斂儲侍民間甚苦以嚮慕文教矢殫其力然猶貸隣倭而後給嘉靖中即有領封會城之議情已微露矣守在四夷當事得無深慮乎

皇明象胥錄二

歸安茅瑞徵伯符撰

日本

日本國原名倭在大海中憑島以居三面環水唯東北限大山山外即毛人國凡島夷百餘不與中國通漢武帝滅朝鮮使驛通漢者三十許國皆稱王其大倭王居邪馬臺一謂之邪摩堆地勢東高西下建武中倭奴國奉貢朝賀使人自稱大夫倭之極南界也桓靈間倭國亂有女子名卑彌呼年

長不嫁以妖惑衆共立爲王法甚峻侍婢千人兵衛嚴設有男弟佐治國魏景初二年倭女王遣使朝獻制詔以爲親魏倭王假金印紫綬後倭女王卑彌呼與狗奴國男王卑彌弓呼素不和相攻轉聞帶方郡爲檄喻之卑彌呼死立男王國中不服爭誅殺乃立卑彌呼宗女壹與年十三其國遂定是後復立男王並受中國爵命晉安帝時有倭王贊四傳至武自稱使持節都督倭百濟新羅任那加羅秦韓慕韓七國諸軍事安東大將軍倭國王宋昇明二年表稱祖禰東征毛人五十五國爰服衆夷六十六國渡平海北九十五國句驪無道圖見吞竊自假授詔除武使持節都督等號倭王如故隋開皇二十年倭王姓阿每字多利思比孤遣使詣闕訪以風俗使者言倭王以天爲兄日爲弟天未明聽政跣趺坐日出停理務云以委弟其誕妄類此大業三年復朝貢使者致詞聞海西菩薩天子興佛法故遣朝拜兼沙門數十人來學國書云日出處天子致書日沒處天子無恙帝不悅諭

鴻臚蠻夷書無禮勿以聞明年遣文林郎裴清使倭度百濟行至竹島南望耽羅國迺在大海又東經十餘國達海岸皆倭附庸倭王設儀仗鳴鼓角迎勞復遣使隨清貢方物唐貞觀五年使來朝永徽初其王孝德獻琥珀大如斗瑪瑙若五升器時高麗百濟暴新羅賜璽書令出兵援之咸亨初王總持遣使賀平高麗後稍習華音惡倭名更號日本自以其國近日所出或云日本倭旁小國爲所併冒其號長安元年其王文武遣朝臣真人粟田

來貢朝臣真人猶唐尚書也粟田工文好學開元初復朝請從諸儒授經悉賞賀書歸其副朝臣仲滿願留歷左補闕多所該識久乃還天寶十二載復朝會新羅梗海道朝貢更繇明越州是時倭女王曰孝明孝明再傳爲女王高野姬貞元末其王桓武遣使來朝學子留肄業歷二十餘年宋雍熙初日本國僧裔然與其徒五六輩浮海至獻銅器裔然衣綠自云姓藤原氏善隸書不通華言問土風以書對其國有五經書佛經白居易集國王以

王爲姓傳襲六十四世文武皆世官并獻本國職員今王年代紀各一卷初主號天御中主次日天村雲尊其後並以尊爲號凡二十三世都筑紫城神武天皇徙大和州當周僖王時其後更以天皇爲號及傳應神始於百濟得中國文字傳欽明併得佛法傳用明有子七歲開悟講聖鬘經天雨曼陀羅華當隋開皇中遣使泛海至中國求法華經又傳孝德白雉四年律師道照求法至中國從三藏僧玄奘受經律論又傳文武遣粟田真人入唐

求書籍又傳白壁遣僧禮五臺山其間亦多女王凡統五畿七道三島太宗召見裔然賜紫衣聞其國一姓傳繼顧語宰相歎息久之天聖四年明州言日本貢方物不持本國表詔卻其貢熙寧後時有僧赴闕元世祖至元初遣使道高麗招諭不得要領六年命秘書監趙良弼往始同彌四郎者入朝十一年命鳳州經略使忻都等以九百艘掠其境稍拔對馬一歧宜蠻各島十四年日本遣商持金易銅錢十八年命右丞范文虎等率十萬人往

征抵五龍山遭風舟破士卒得生還者三人尋以
有事交趾不復議日本亦竟不至 明興頻寇山
東濱海州郡及淮安洪武二年以卽位頒諭仍掠
崇明四年

上遣萊州府同知趙秩泛海 賜璽書讓其王源
良懷良懷言蒙古嘗誅我好語隨襲以兵其使趙
姓今使者亦趙姓豈其裔耶擬兵之秩不爲動徐
宣諭朝廷威德良懷氣沮遣僧隨秩表貢方物送
回所攜明越人口

上亦遣僧祖闡無逸報使然其寇掠自如始令閩
浙造海舟備倭德慶侯廖永忠請令沿海軍衛添
輕舸巡徼從之七年來貢無表文其臣亦私貢馬
及茶布刀扇所奉丞相書甚諄

上怒卻其貢已因安置所遣僧於川陝十三年丞
相胡惟庸謀逆潛納倭精銳貢艘爲應事泄著

祖訓勿復與通明年卻其僧如瑤貢命禮部以書
諭責之十六年以信國公湯和巡視海上築登萊
至浙並海五十九城二十年遣江夏侯周德興築

福建並海十六城自南直山東及閩浙粵咸置行都司增屯戍嚴下海禁二十七年勅魏國公徐輝祖練浙兵海上永樂初其王源道義脩貢會對馬臺岐諸島夷數寇掠諭征捕獲渠魁以獻厚賚白金文綺予勘合百道令十年一貢使額無踰二百船止二艘勿挾兵器尋賜金印詔冊封爲日本國王名其國鎮山碑而銘之八年源道義死命鴻臚少卿潘賜往弔祭明年倭寇磐石十五年寇浙東海上多獻日本俘遣禮部員外郎呂淵等諭還

所掠明年其王源道特遣使奉表謝罪十九年以三千人突寇遼東總兵劉江殲其衆初江閱地形得金線島西北望海窩勢高峻扼海咽喉特爲增築及偵倭至伏兵山下別遣奇兵焚舟斷其歸路倭中伏擒斬且盡江以功封廣寧伯自是倭不敢復窺遼宣德初以倭貢踰約申定格例然倭自得我勘合多指稱貢舶藏兵刃備謹卽貢備弛卽掠貢卽愆期所司不敢深摘聽抵京師宴賚市易飽飫而去稍睨疎防蹈瑕殺擄捆載固未已也正

統後海上防漸疎四年倭船四十餘夜入大嵩港轉破昌國衛城恣焚掠於是申嚴斥堠合兵分番沿海寇盜稍戢成化二年連寇大嵩四年鄞人林從傑等三輩轉掠爲通事隨倭使人貢奏乞歸省許之仍禁勾引通番十三年倭忽至寧波覘有備詭云脩貢庶吉士楊守陳貽書主客極言倭借貢蓄奸請得謝絕不從正德四年其王源義澄遣宋素卿來貢素卿者故鄞人朱縞也弘治中逋歸倭有寵于其王僞充正使其叔朱澄識之守臣覺發

以厚賂巨璫劉瑾置不問令還諭王無盜邊因求祀孔子儀注不許嘉靖二年素卿再至時其王源義植孱闇諸島強請勘合爭入貢邀利左京兆大夫藝興遣僧宗設右京兆大夫高國遣僧瑞佐及素卿踵及寧波故事凡番貢至閱貨宴席並以報至先後爲序素卿狡賄市舶中官賴恩攬閱瑞佐貨及宴又引坐宗設上席間爭長相讐殺而宗設黨盛尾追素卿及紹興臨城索不得遂躡旁邑殺備倭都指揮劉錦去已因漂入朝鮮其王李懌得

二倭獻

上以臺省糾叅下素卿獄并二倭繫論並瘦死特遣給事中劉穆往浙體訪兼飭武備四年縱日本僧妙賀等歸國諭其王捕宗設九年琉球請封道日本附表乞貫素卿并懇新勘合脩貢禮部驗表文無印請勅琉球傳諭自是絕貢者十七年尋再至以違格罷初方國珍張士誠分據温台寧紹諸郡並瀕海及已降滅而餘黨逋海上輒糾島倭入寇以故洪武中瀕海州郡數中倭

高皇帝業增置戍守又命南雄侯趙庸招集蛋戶漁丁之族自淮浙暨閩廣幾萬人悉藉爲兵於是海上羣惡少皆仰給縣官而方張餘黨亦以次老死瀕海因得息肩永樂西洋之役華人習知海外饒有琛怪旣生艷慕而貢夷往來益習我海道曲折糾引蔓附剽寇復起至是以科臣言併罷市舶而利孔反爲奸商所竊每番舶至以虛詞餽取轉展賒負絕不償直以乃投豪貴家豪貴家侵牟眎奸商逾甚番人坐索動以危言撼當路驅逐又先

期漏語使逸以示德陰握全利其後番人聞而飲恨盤據海洋必劫有其貲蓄乃已而亾命不逞強有力者復入海聚衆爲舶主行賈閩浙以財役屬勇悍倭闌入互市乘機剽掠如許棟王直徐海實繁有徒海上因之多事焚劫寧台幾無寧歲矣二十六年始設浙江巡撫都御史兼領興福漳泉治兵捕賊以朱統爲之統清勁果於任事日夜詰兵嚴糾察根株通海窟穴遂搗雙嶼擒巨酋許棟因上章鐫暴二三渠魁侵豪貴諸豪屏息切齒亡何

諷臺省奏改統爲巡視竟以專殺奪官并下統同事海道副使柯喬都指揮盧鏜于理詠統飲藥自殺兼弛海禁而東南瀕海寇益恣無敢呵者三十年王直突入定海關明年壬子倭犯台州破黃巖縣自象山流劫郡邑復簡都御史王忬巡視浙江及興福漳泉海道添設叅將二員以都指揮俞大猷湯克寬分浙閩轂勦而幕府久廢兵政積弛士柔脆不習戰鬥忬至請假事權募梟勇徵狼土諸兵規畫稍定明年癸丑倭犯温州大猷冒險出洋

擣穴羣賊駭散狂突克寬統部卒東西馳擊頗獲首功而賊勢張甚王直各部擁漳廣羣盜合島倭連艦百餘破南滙所薄太倉入上海遂圍海鹽掠平湖陷昌國衛臨山所再攻海寧衛破乍浦延及寧海奉化諸邑凡畱內地三月所在焚蕩西犯松陽北侵海州而福寧秦嶼所亦遭寇頃之以兵科奏改忬巡撫提督軍務湯克寬以副總兵屯金山忬薦盧鏜代以俞大猷總浙直兵時任環以雄略自府同知擢備兵蘇松松陽令羅拱宸亦以知兵超陞浙憲也其秋倭流劫興化擊卻之宅部據南沙踰五月明年甲寅春潰圍出嚙蘓松旁邑北掠通州如臯海門改兵部侍郎屠大山爲應天都御史亦以巡撫兼提督倭續自南沙登岸湯克寬敗之採淘港而俞大猷勦普陀倭爲所乘叅將盧鏜禦之嘉興再戰孟家堰亦敗遂陷嘉善焚運艘轉攻嘉興府因我師迎擊遁乍浦合長沙灣寇且東掠崇明而慈谿忽報地湧血尺餘本兵條上方略始議重賞招巨酋王直矣兵科疏駁

上是之命一意主勦是時

天子蒿目東南特採廷臣言命南京兵部尚書張經開府總督直浙福廣山東軍務經故嘗督兩廣著績會議徵狼土兵扼倭乃用經節制當天下半得辟召叅佐便宜從事經亦慷慨以盪寇自負中外企踵謂倭旦晚可盡也亡何都御史王忬改撫山西代以徐州兵備李天寵忬規度浙閩頗有緒以弛擔中輟而經以留京遙制鞭長不及羽檄征調不能猝佐緩亟再奉嚴旨專閩所起宿將何卿

沈希儀等又嘆惜不爲用以是訖無成功始倭還屯柘林進薄嘉定叅將李逢時募山東槍手六千人適至敗之新涇橋追奔中伏復潰詔建屠大山褫爲民改張經右都御史專總督而倭連犯海門金山青村所續至萬餘流突樂清黃岩諸縣柘林倭且分掠嘉湖我師禦之窰墩失利是歲量蠲被倭郡邑田租罷浙歲貢魚鮮而倭據川沙窪柘林爲穴明年乙卯柘林倭奪舟犯乍浦陷崇德轉掠湖州新倭日增唯兵備任環督舟師敗之南沙

斬級百餘會所調田州瓦氏等狼土兵至蘇人心稍定而工部侍郎趙文華且報祀海神督察江南也文華故事輔臣嚴嵩兼挾

上寵欲願指督臣經出其上經自以宿望不爲意心啣之時狼土兵新集銳請擊倭趨利文華促經經欲候所徵永保兵并力以文華佻矣不敢漏師期而江北三丈浦川沙窪倭報日至文華以經固老師觀望也亡何柘林倭三千餘躡金山俞大猷迎擊大潰遂犯嘉興時永保兵則已集軍門矣經

遂遣叅將盧鏜等督狼土等兵水陸遮擊石塘灣倭敗奔平望回走王江涇副總兵俞大猷以永保兵夾擊遂大敗之共斬級千九百八十有奇溺死無筭倭大氣奪而

上入文華言業遣緹騎逮經捷聞兵科留經乘勢進擣

上惑相嵩歸功文華及御史胡宗憲 賜金幣經功自如不爲貰經去而軍中解體尋以應天都御史周琬代琬罷改戶部侍郎楊宜並齷齪無將略

倭勢復張項之任環及俞大猷等攻倭陸涇埧斬級二百七十有奇焚舟三十時柘林白茆三丈浦倭並奪舟遁我師遮擊多擒斬它倭百餘從會稽高埠流劫杭歙直趨南京已又徐從宜興轉入滸墅應天都御史曹邦輔督師殲焉趙文華計攘首功矚柘林餘倭穴陶宅大集浙直兵會勦失利已而倭遁周浦突圍與川沙窪倭合我師邀擊破之文華遽報蕩平歸朝而浙福都御史李天寵建訊與張經並死西市以宗憲代皆文華之爲也是歲

日照莆田福清並有倭警明年丙辰以文華言遂擢宗憲代宜總督倭聚新場倭環督永保兵進勦再潰因建曹邦輔謫戍邊尋以叅政阮鶚代宗憲督軍務而倭慘掠慈谿巨酋徐海衆復大至一由海門一由松江一由定海關而海自擁部萬餘導所窟柘林酋陳東併兵逼乍浦已聞督撫移師遂從硤石趨皂林鶚以輕舸馳入桐鄉令河朔將宗禮引所部兵九百遮倭擊殺數百人海爲辟易以援絕火藥盡前迫橋陷與驍將霍貫道俱死之倭

遂乘勝圍桐鄉急引撞竿撞城城幾壞城上人以
縉索挽上斷竿又煮鐵汁灌城下所以堅守百方
倭稍卻亦會總督間使人持重賂說海罷圍且疑
陳東以携其交海驟道崇德西遯東留攻一日勢
孤亦引去桐鄉圍始解而趙文華復以尚書督師
始文華言江南殘倭易殄頃更蔓延

上覺其欺相嵩爲營特遣已至浙則與宗憲圖襲
海宗憲日夜啗海金帛祥約擊吳淞江倭縱奪舟
去以遲援兵之集謀聞海麾下書記酋葉麻最黠

與海爭一女子相失因諷海縛麻而陳東以桐鄉
之役睚眦與葉麻聲相倚更遣謀持璣翠遺海侍
女說海并縛東且詐爲葉書遺東陰泄之海海得
書泣下心德宗憲竟縛東以報麻與東相繼縛則
海部曲內亂因說海至平湖庭謁堅約令海與陳
東黨分屯沈庄輒詭爲謀令兩相悞至稍而鬪乃
督永保兵如檣進乘風縱火海窘沉河死殲其黨
俘葉麻陳東獻遂進文華少保宗憲右都御史餘
倭窟舟山俞大猷攻之未下會夜大雪督兵擲火

焚其柵盡殪復斬級百四十餘是歲倭突古田潮州明年丁巳併獲巨酋王直王直故歛人走海上爲舶主頗任俠島主並嚴事之他舶往往借名行入掠托之直跡故秘先是宗憲以頻歲苦倭特海上亾命勾引島夷內訌其國王故未之知也疏得遣使諭日本王禁戢報可以鄞諸生蔣洲陳可願往而宗憲以鄉曲習知直迎直母妻至慰藉甚厚因遣洲等間過直所洲等遇直五島直爲言日本方亂諸島不相攝誠貫直等通貢互市願擊賊自

効遂留洲往諭各島別遣養子王激毛臣先後投款宗憲結以重賂且令間說徐海已而遣諭直降爲置司海上通互市直亦自分能力主島夷欲詣宗憲面相結謬以豐洲王入貢爲名泊岑港宗憲又厚餽遺遣指揮夏正等爲死間直遂挺身入杭州宗憲曲諭直伴羈獄具疏聞上不敢深悉其故廷議以直元兇坐棄市宗憲得加太子太保餘遷賞有差而直黨三千人竄據岑港及舟山遂流劫浙東江北蔓延閩粵時阮鶚以都御史移撫閩而

倭掠泰州淮安入寶應叅將劉顯率苗兵敗之東鄉多焚溺明年戊午倭犯興泉境遂陷福清南安以岑港倭阻守奪總兵俞大猷秩命兵部郎中唐順之視師浙直明年己未倭流劫揭陽福安及浙西象山攻桃渚所而岑港倭自柯梅趨泉州浯嶼閩人大譁宗憲縱寇詔建大猷卽訊尋釋立功江北倭數道入都御史李遂馳如臯部諸將無令越天長瓜儀尾及廟灣絕地督兵圍勦遂大破之斬級八百有餘己又遣劉顯殲倭劉家庄自壬子

倭入黃岩至是首尾八年江南北略平浯嶼倭亦旋遁總督胡宗憲用間力爲多四十一年以言官論劾建宗憲至京尋釋之罷浙福總督而閩倭復告急初倭阻寧德之橫嶼連營負險叅將戚繼光至令人持束草填河進力戰斬級二千六百餘生擒踰九十乘勝勦福清倭復破之因引兵還浙遇倭自東營澳登岸迎斬百八十級遂去而倭勢轉熾明年進薄興化城攻圍匝月叅將劉顯頓兵不敢進及城陷復命繼光及俞大猷馳援時倭巢平

海衛欲逸爲俞大猷所扼與繼光夾擊縱火糜巢
中仙遊連江諸寇悉平倭盡走廣東界方繼光抵
福清父老請師期繼光曰吾遠來疲甚且休矣偵
者歸語弛不爲備其夕銜枚疾馳三十里黎明逼
其巢大呼縱擊倭披靡莫敢枝梧已破倭歸邑人
未知兵出也廣東倭屯潮之烏石爲俞大猷所破
逃至甲子門將入海風暴盡溺餘衆二千留屯海
豐大猷圍之食盡思遁副總兵湯克寬伏兵擒勦
且盡倭患遂息維時四十三年計海氛踰一紀始

靖而受害浙最劇次南直次閩又次粵城邑燼於
兵火子女窘於攘斂行齋居送累鉅萬萬東南脂
髓幾於盡吸而倭亦連舶不獲返然率海上奸氓
爭以入寇之利餌倭中無賴少年藉爲前行推波
鼓譟其間真倭僅十之一二絕與其國王不相聞
前遣蔣洲至豐後島轉諭山口所據山口都督源
義長及豐後太守源義鎮並具咨表貢方物謝罪
量犒其使令浙藩司移咨義鎮等轉諭王鈐束亦
杳無報命者自是海上封守益密日本遂絕朝貢

隆慶時海寇曾一本等勾引犯閩粵我亦嚴備旋及撲滅非復颺發如嘉靖之季矣萬曆二十年倭酋關白平秀吉篡立遣酋清正行長侵朝鮮猝陷慶尚道掠開城繞出平壤西其王昫令次子暉攝國事走義州求內屬命兵部侍郎宋應昌督總兵李如松等勒兵七萬往援明年春戰平壤攻牡丹臺大破之得級千二百八十五倭奔王京我師略地碧蹄中伏敗衄已申款倭棄王京棲釜山朝鮮王遂復國因撤師渡江歸又明年議封秀吉爲日

本王倭中變又明年復命總督侍郎邢玠經略以總兵麻貴濟師都御史楊鎬特開府天津經理朝鮮倭酋清正屯蔚山與釜山倭犄角我師至則圍蔚山絕餉道倭饑佯約降而行長從釜山聲援張虛幟蔽江我師遽撤爲倭襲擊大潰時戊戌正月也會別將陳璘劉綎先後至分水陸四路進勦稍有斬獲明年九月秀吉死遮擊歸倭以捷聞凡拮据八年而後定其後對馬島倭與朝鮮復私款三十七年倭酋玄蘇等稱奉國王源秀忠命假道朝

鮮修貢是時薩摩州倭并琉球殺取雞籠淡水噬
閩廣四十年冒琉球入貢卻之明年倭酋平義智
請貢路 詔飭防海上四十四年三月肥前州歸
我把總董伯起初議封平秀吉或云日本王見住
山城關白名號如漢大將軍秀吉死遺孤秀賴甫
七齡爲娶巨酋家康女孫令家康協輔與薩摩州
太守平義弘抗不相下頃家康故自長歧島外勢
頗携始家康擱焉窺南鄙而長歧之酋曰等安卽
桃員者得罪家康懼爲所滅請取東番自贖遂令

次子秋安連犯閩之東湧大金尋家康死而局中
變或云家康傳位其子秀忠稱新關白其詳不可
深考然聞薩摩州於倭諸島兵最勁俗喜鬪以良
死爲無勇諸島皆憚其銳前此入寇亦多薩摩肥
後長門三州人巨酋陳東卽薩摩州王弟之書記
也次則大隅筑前筑後博多日向及豐前豐後和
泉諸島日本主以山城爲都山城君號令久不行
金印勘合向入山口自山口亾并不知所歸諸島
酋長競相攻強則役屬嘉靖時豐後爲大兼有肥

後等六島及平秀吉雄據六十六州今亦寢微國中殆無常尊云大抵倭船之來利東北風唯清明後爲多而重陽後間有之故防海以三四月爲大汛九十月爲小汛其帆檣所指一眎風候有備者勝按胡松海圖說曰始倭通中國自遼東今乃從南道浮海率自溫州寧波入其西北至高麗必由對馬島開洋順風僅一二日南至琉球必由薩摩州開洋順風七日其貢使之來必由博多開洋歷五島入中國以造舟水手俱在焉若入寇則隨

風所之東北風猛則由薩摩或五島至大小琉球而仍視風之變北多則犯廣東東多則犯福建若正東風猛則必由五島歷天堂官渡水而視變遷東北多則至烏沙門分艚或過韭山海關門而犯溫州或由舟山之南而犯定海犯象山奉化犯昌國台州正東風多則至李西魯壁下陳錢分艚或由洋山之南而犯臨觀錢塘或由洋山之北而犯青村南滙犯太倉或過南沙而入大江若在大洋而風歛東南則犯淮揚登萊若在五島開洋而南

風方猛則趨遼陽趨天津其大較若此矣性輕生
好鈔掠尤耽麩蘖餅奕棊及雙陸略通草書男子
魁頭斷髮黥面文身婦人被髮屈紒衣如單被穿
其中以貫頭皆跣足間用屨板屋布地以砂所佩
刀極犀利每戰赤體單列提刀突前爲蝴蝶陣以
揮扇吹海螺爲號工設伏船製大者容三百人然
早隘遇巨艦難於仰攻且苦犁沉廣福船皆所畏
海水鹹不可飲其來開洋必取水五島抵中國境
復停船換水土溫燠宜禾稻產金銀琥珀水晶硫

黃水銀銅鍍白珠青玉蘇木胡椒細絹花布螺鈿
灑金漆噐扇犀象刀劔互市華人喜得錦綺絲綿
磁針貢道故由寧波今久絕而通番人日衆

論曰史稱倭在會稽之東晉夏少康有子封會稽
斷髮文身以避蛟龍之害今倭好沉沒取魚亦文
身厭水禽俗殆近之魏志次倭旁國夥矣其二云始
渡海千餘里至對馬國今倭島名對馬近朝鮮豈
卽其遺域與往海上國凡百餘統以大倭王項諸
島各爲雄長山城君寄空名其上意略似而強弱

不類然倭自通中國歷二千有餘載或貢或否不聞躡及內地而獨發難 本朝至嘉靖季沿海郡邑焚劫略盡則皆華人嚮導而通番之爲祟烈也鄭端簡謂市舶不可罷江南海夷有市舶所以禁海賈而抑奸商而俞大猷言倭市僅刀扇我獲利薄又易蔓禍

高皇帝禁通貢意甚遠唯察風候而以舟師扼之鯨波乃爲長畫大猷以信國裔習海上事當有徵矣卽胡宗憲執訊獲醜洵有大造東南比於朱統猶爲焦爛餘智策倭今日其亦審所畫哉

録

藏板

一

二

三

四

五

六

七

八

九

十

十一

十二

十三

十四

十五

十六

十七

十八

十九

二十

二十一

二十二

二十三

二十四

